

四庫全書

史部

欽定四庫全書

史部

江南通志卷一百五十六

詳校官給事中臣丁雲錦

檢討臣德生覆勘

總校官編修臣王燕緒

校對官助教臣卞維吉

臚錄監注臣許蔭培

欽定四庫全書

江南通志卷一百五十六

人物志

忠節

四 廬鳳潁三府滁和廣六泗五州

廬州府

楚范增居鄴六年七十好奇計說項梁立楚後佐項
羽霸天下漢王用陳平計間項王項王疑范增增
大怒曰天下事大定矣君王自為之願賜骸骨歸

行未至彭城疽發背死

三國王蕃字永元廬江人博覽多聞兼通術藝為散
騎中常侍孫皓時衆譖毀蕃蕃氣體高亮不能承
顏順指遂迁皓意見殺丞相陸凱上疏曰蕃處朝
忠蹇大吳之龍逢也昔事景皇納言左右歎為絕
倫而陛下惡其直對臬之殿堂有識悲悼

宋詹世勛家於舒修偉沉毅其勇莫敵累薦為舒城
民兵正將弟世勳副之招募強壯結以信義與敵

戰栲栳原被重創死

密佑廬州人咸淳十年為江西都統元師逼撫州
佑逆戰被圍數重力戰終日衆幾盡乃斫圍南奔
渡橋馬蹶被執元帥壯其勇欲降之不屈許以官
不受又令佑子說之曰父死子安之佑叱曰汝行
乞於市第曰密都統子誰不憐汝也怡然解衣請
刑觀者泣下

褚一正字粹翁廬州人武舉進士為提刑諮議督

戰高沙被創死

劉師勇廬州人以和州防禦使助姚訔守常州時
張彥守呂城兵敗被執常州勢益孤元巴延寘彥
城下招降師勇以大義斥彥及城陷師勇潰圍出
從二王海上憂憤而卒

元余闕字廷心合肥人少喪父授徒以養母登元統
元年進士由同知為刑部主事三月疏滌冤滯獄
五百入翰林修宋遼金三史至正壬辰天下兵動

闕為淮西宣慰副使分守安慶賊不能犯者五年
累遷淮南行省右丞陳友諒兵薄城下闕戰却之
賊益兵來攻闕為士卒先身被十餘創城陷死之
妻蔣氏子德臣女安安皆赴水死甥福童戰死闕
賜諡忠宣明太祖詔立廟歲時祀之

明劉友仁合肥人與弟謙隨胡大海取徽寧等處多
戰功歿於陣命祔祀功臣廟

廖永安字彥敬巢人從太祖率舟師攻曼濟哈雅

渡江下太平集慶克池州所至有功後擊張士誠
戰太湖水淺舟膠被執欲降之不屈死追封楚國

公諡武閔

桑世傑無為人明初與諸將攻江陰石牌寨陣亡
贈永義侯侑享太廟

汪澤廬江人鄱陽湖戰歿封廬江縣子祀康郎山
徐明合肥人陳友諒攻洪都明為管軍百戶從指
揮薛顯開城突戰被執死之追封合肥縣男

邱明合肥人陳友諒圍南昌明從諸將往援之遇敵康郎山大戰死於陣追贈梁縣子

王仁趨舒城人從征陳友諒戰鄱陽湖陣亡封舒城縣男廟祀康山

王德 朱昇同戰死於康郎山皆贈合肥子祀康山忠臣廟

宋國興合肥人年十八以總管先登與陳額森戰南臺太祖解白龍袍衣之敵誤以為太祖攢槊刺

之至死常遇春翼上潰圍出其弟晟嗣兄官累軍
功為副總兵靖難後進都督封西寧侯卒諡忠順
汪河舒城人個儻有大志嘗師余闕以文章名太
祖渡江用為大都督府都事奉使庫庫特穆爾被
拘六年完節不屈逮王師下河南庫庫遁走定西
河始得歸陳征西方畧進吏部侍郎

濮英合肥人從將軍馮勝出征遇伏發被執英絕
食不言乘間自剖腹死贈金山侯諡忠襄子璵在

襁褓即封為西涼侯

瞿能合肥人通子少隨父立功驍勇絕倫建文時以都督從李景隆北拒靖難兵力戰白溝河所向披靡斬馘數百會旋風起及其子俱戰死

余瑱合肥人官北平都指揮與同官謝貴密謀拒靖難師貴死瑱走居庸關練兵將襲北平成祖命將往擊之瑱且戰且守援兵不至棄關走懷來再敗被執死之

徐凱合肥人鎮守四川靖難兵起召充副總兵移鎮滄州與吳傑平安等相為犄角兵敗被擒不屈死

甯忠合肥人累官都督建文初從李景隆進拒北平戰敗真定被執不屈死

宋瑄合肥人西寧侯晟之子建文中為右衛指揮使禦靖難兵戰死靈璧弟瑛尚公主嗣侯爵殉土木之難同邑劉真以軍功充大寧總兵靖難兵起

真夜負勅印浮海而南還應天成祖即位命鎮遼
東愧憤卒

陳懷合肥人永樂中積戰功至都督正統中封平
鄉伯死於土木之難贈侯諡忠毅

陳植合肥人元舉鄉試不仕洪武間為主事建文
初官兵部侍郎靖難兵至植督師江上督將密謀
送款植責以大義督將遂殺植迎降邀賞成祖立
誅其人具棺殮植遣官護喪歸葬

周讓字克遜無為人洪武中監生通敏博辯個儻尚氣節以劉基薦任給事中永樂初兩使西域被拘徙之荒野瀕死者數讓終不屈諭以本朝恩信卒令番人隨之入貢有重使古剌集備載其事

李紹賢字崇德其先巢人編伍泗州正德丁丑舉進士除行人篤學敦行遇事果決以小臣抗疏諫止南巡被杖五十創甚數日死

盧謙字吉甫廬江人萬曆三十二年進士知永豐

縣擢御史督北直學政逆璫煽焰告病歸里崇禎
八年流賊破城謙朝服端坐大罵死之賊投尸於
池水盡赤贈光祿卿時殉節於流寇之亂者有合
肥人黃克嘉任湖東守備勦賊死廬江舉人張弘
任四川知縣巢縣人曹同任鄖西知縣俱城陷被
執死

程楷合肥人天啟乙丑進士知平湖縣陟南禮部
郎出守東昌峻拒屬吏之餽歷雲南參政歸壬午

流賊圍城楷與經歷鄭元綬協守南薰門城陷不屈死之贈光祿卿

胡守恒字見可舒城人崇禎戊辰進士授嘉興推官召試平臺改編修晉東宮講官庚辰較禮闈乞歸養獻賊攻城守恒與遊擊孔廷訓督民兵共守廷訓叛降賊遂見殺子永亨夜入賊營收骸歸葬康熙庚戌成進士授行人分巡廣東有治績

鳳陽府

漢陳咸沛國浚人成哀間以律令為尚書平帝時王莽輔政誅不附己者何武鮑宣等咸嘆曰易稱君子見幾而作吾可以逝矣即乞骸骨去及莽篡位召咸為掌寇大夫不肯應時三子參豐欽皆在位悉令解官歸鄉里閉門不出入猶用漢家祖臘曰吾先人豈知王氏臘乎後莽復徵咸遂稱病篤收斂其家律令書文皆壁藏之常戒子孫曰為人議法當依於輕雖有百金之利慎無與人重比

三國樓玄字承先沛郡蘄人孫休時為監農御史孫皓時歷官大司農皓求忠清之士用玄為宮下鎮禁中侯主殿中事玄正身率眾奉法而行應對切直數忤皓意後人誣玄訕謗政事遂被詰責送付廣州華覈言玄清忠奉公乞赦之以責後效皓疾玄聲名徙交阯密勅將張奕殺之奕未忍殺奕卒玄於器中見勅書還便自殺

晉嵇紹字延祖魏中散大夫康之子也十年而孤事

母孝謹山濤領選啟為祕書丞元康初為給事黃
門侍郎以不阿比侍中賈謐封弋陽子遷散騎常
侍趙王倫署為侍中惠帝復阼遂居其職河間王
顥成都王穎舉兵向京都朝廷北征紹馳詣行在
值王師敗績於蕩陰百官散潰唯紹儼然端冕以
身捍衛兵交御輦紹遂被害帝側血濺御服及事
定左右欲浣衣帝曰此穉侍中血勿去累贈太尉
謐曰忠穆

桓彛字茂倫譙國龍亢人榮九世孫起家州主簿
為遂道令累遷尚書吏部郎明帝伐王敦參密謀
敦平封萬寧縣男丹陽尹尋補宣城内史蘇峻之
亂彛率兵討之時州郡多遣使降峻稗惠勸彛偽
與通和以紓交至之禍彛曰吾恩義在致死焉能
與醜逆通問如其不濟此則命也遣將俞縱守蘭
石峻攻之將敗左右勸縱退軍縱曰吾之不可負
桓侯猶桓侯之不負國也力戰死彛固守經年勢

孤力屈城陷遇害咸安中改贈太常諡曰簡五子
溫靈豁祕沖

南北朝梁裴之橫字如岳壽陽人之高弟好賓游重
氣俠不事產業之高乃為狹被蔬食以激勵之遂
與僮屬數百人於芍陂大營田墅遂致殷積侯景
亂出為貞威將軍討景又隨王僧辯破侯景於巴
陵景退遷平北將軍封豫寧侯復為吳興太守魏
尅江陵橫出守蘄城營壘未周而魏軍大至兵盡

矢窮遂於陣歿贈侍中司空公諡曰忠壯子鳳寶

嗣

唐夏侯端壽春人高祖微時與相友即位拜河南道
招慰使傳檄州縣次譙州會亳汴二州刺史已降
王世充道塞無所歸計窮糧盡麾下二千人不忍
委端去端乃殺馬宴大澤中謂衆曰我奉王命義
無屈公等宜去因欲自刎爭持之乃止世充遣人
以吏部印召之端焚書解節毛懷之間道走歸拜

祕書監出為梓州刺史

何武壽春人嘗被誣至州投石自明守釋之未幾
寇起武詣守曰此誠畢命之秋也領偏裨入樅陽
兵潰鬪死

周憬壽春人仕唐謀誅武三思不克遁入比干廟
謂人曰比干古忠臣神而聰明其知我乎三思虐
害忠良滅亡不久可竿吾頭於國門以見其必敗
遂自刎

宋姜才濠州人為通州副都統時淮多健將然驍勇
無踰才才知兵善騎射撫士卒有恩至臨陣軍律
凜凜守揚州與元師戰流矢貫肩才拔矢揮刀而
前所向辟易德祐二年宋亡阿珠使人招之才曰
吾豈作降將軍耶東至泰州將入海阿珠圍之會
才疽發脅不能戰遂為所執勸之降肆罵不屈阿
珠怒曷之揚州

元張仲仁臨淮人讀書尚氣節流寓泗州以賈魯召

歸諭安豐不克死之子順理亦死

明韓成虹縣人從太祖征陳友諒大戰鄱陽湖被圍計無所出成進曰古有殺身以成仁者臣不敢辭太祖遂賜龍袍成服之對賊衆投水中以疑之賊遂退友諒敗死追封高陽郡侯祠於康郎山

趙德勝濠人勇敢有氣節從太祖累功為元帥守南昌陳友諒攻城將壞德勝且戰且築城復完巡城至東門腰中流矢鏃入六寸拔出嘆曰命也恨

不能從上定中原垂令名於竹帛耳言畢而絕贈
梁國公諡武桓祀功臣廟

花雲懷遠人驍勇絕人從太祖累建奇功守太平
陳友諒來攻城陷被執怒罵奮躍而起縛皆絕奪
守者刀連斬五六人衆怒叢射之至死罵不絕口
追封東丘郡侯

茅成定遠人攻張士誠戰死追封東海郡公

曹良臣壽州人積功封宣寧侯北征至鄂勒琿河

敵騎大集力戰死焉追封安國公諡忠壯

孫興祖濠人恪之父沉毅有謀大將軍徐達倚重
之守海陵移鎮彭城累官副都督守燕山六衛出
塞遇敵力戰死追封燕山侯諡忠敏

李夢庚鳳陽人從太祖渡江與郭景祥同典文書
為左司郎中歷都督府參軍謝再興守諸全上命
夢庚往總制軍事再興忿夢庚出已上遂叛執夢
庚以降吳夢庚死之祔祭功臣廟

張耀壽州人累功為指揮使北征戰歿

常榮懷遠人遇春再從弟為指揮同知隨李文忠北征戰於鄂勒琿河陷陣死之

常惟德懷遠人從太祖為鎮撫戰死鄱陽湖封懷遠子祭於康山忠臣廟

常德勝懷遠人從太祖為千戶戰死鄱陽湖封壽春縣男祭於康山忠臣廟

劉成靈璧人從征有功守長興為永興翼左副元

帥張士誠兵以十萬來攻成出西門擊敗之擒其帥敵愈衆戰死贈懷遠將軍立廟長興

孫虎壽州人屢立戰功為指揮使北征至應昌遇敵鏖戰死之追贈樂安伯

楊國興定遠人從太祖累立戰功最驍勇鎮宜興授指揮使征張士誠戰死於閭門

胡觀定遠人東川侯海次子靖難兵起力戰死

徐輝祖達長子嗣爵有材氣數出練兵各省靖難

兵起建文帝命援山東與燕再戰破之及召還而諸將遂不振燕兵渡江猶引軍力戰燕王至金川門獨守父祠不迎遂削爵幽繫之尋卒萬曆中錄建文忠臣廟祀以輝祖居首諡忠貞

丘福鳳陽人起卒伍事成祖於藩邸撲鱗鷲勇臨陣敢力戰深入累功封淇國公後北征至臚胸河敵大至被執遇害

李遠懷遠人以靖難功封安平侯嘗以輕騎八百

破敵數萬後與丘福北征力戰馬蹶被執罵不絕口死追封莒國公諡忠壯

伍雲定遠人以衛指揮同知從征交趾屢有功仁宗初隨方政討黎利於茶籠鼓勇陷陣死之

陳忠臨淮人永樂中積官指揮同知仁宗時從征交趾攻多邦城先登擒偽官阮事吳忠等黎利寇清化戰死與伍雲同優卹

崔聚懷遠人從成祖起兵累授都督僉事宣德初

同柳升征交阯升死聚整軍至昌江賊至力戰被
執不屈死

魏貞懷遠人進士官御史從英宗北狩死土木之

難

湯允勳字公讓鳳陽人和曾孫始為諸生善詩景
泰初求將才周忱薦之授錦衣百戶歷衛指揮僉
事諸將忌之不令治事益放情詩酒與劉溥王淮
輩唱和號十才子天順中落職成化時以薦授延

綏參將分守孤山堡寇大至允勳方病力疾上馬
禦戰衆寡不敵陷陣死事聞贈祭

朱勇懷遠人能子頰面虬髯歷掌都督府事晉太
保久典兵柄正統十四年隨駕北征歿於陣追封
平陰王諡武愍

劉雄臨淮人成化時為四川都指揮僉事剛勇敢
戰嘗捕漢州賊生擒七十餘人德陽人趙鐸亂雄
追之羅江大水河連敗賊以救千戶周鼎徑奔賊

陣叢刺死贈都指揮同知子襲職

皇甫斌壽州人為衛指揮同知每戰必身先士卒
宣德中禦寇於密城東峪自旦及晡力戰矢盡援
絕而死子弼以身衛父亦戰死

方震孺字孩未壽州人萬曆癸丑進士由知縣授
御史天啟初以巡城忤魏璫璫銜之值遼警一日
上十三疏慷慨請出關犒師遂以監軍巡按遼東
時巡撫王化貞棄廣寧而震孺莅前屯嚴守璫惡

震孺亦罪及之誣以賊私咒詛坐大辟懷宗初釋
免久之起巡撫廣西京師陷率師勤王馬士英阻
之憂憤而卒

張應徵字賓明定遠人明末任泰安州同知值土
寇為亂城陷應徵手刃數人被執罵不絕口曰城
破身亡吾事畢矣遂遇害

許心亮臨淮人明末為劉兵所執問城中虛實亮
拒言火器糧餉甚足劉怒縛於樹截其兩耳亮罵

不絕

武一諤宿州人為徐王墳世襲祀丞崇禎丙子流寇亂居民盡逃一諤謂職司林木當以死守同妻路氏及子孫闔門罹難有司上其事請恤

陳保山臨淮人崇禎八年以都司守臨淮流寇壓境保山力戰於隆平寺死之

柳鳴鳳鳳陽人明末司訓安慶流寇破城黨有鳴鳳鄉人欲全之鳴鳳曰丈夫受君恩寧肯偷活可

借爾刀礪我頸遂被害

孫光啟靈璧人明末為興化教諭城破投泮水未死輿人掖以見帥予以官不受

徐永吉壽州人家貧養親自守明末流寇偪令為賊抗節不從賊怒殺之

潁州府

周伍員字子胥潁之乾谿人父奢為楚平王所殺員走入吳闔廬使為行人謀伐楚魯定公四年與楚

戰於柏舉楚師敗績遂入郢闔閭死子夫差立敗越於夫椒越王使使厚幣請和員諫弗聽太宰嚭讒之王賜之屬鏤之劍以死吳人思之為立祠江

上

晉丁穆字彥遠譙國人為順陽太守苻堅寇順陽穆戰敗被執稱疾不仕後堅傾國南寇穆與關中人士謀襲長安事泄遇害

宋呂祉霍丘人進士官都督參謀紹興間淮西副統

制鄜瓊叛降於劉豫社死之妻吳氏亦自縊以殉
孫暉霍丘人靖康之亂團結淮民保護鄉井擢招
信尉建炎中北兵將渡淮暉率兵民禦之城陷死
於勅書樓

牛富霍丘人為侍衛馬軍司統制戍襄陽移守樊
城累戰不為劬且數射書襄陽城中遺呂文煥相
與固守兩城凡六年不拔富力居多城陷富帥兵
巷戰身被重傷以頭觸柱赴火死贈靜江軍節度

使諡忠烈

洪福安豐人夏貴家僮也從貴積勞為鎮巢雄江
左軍統制貴降元遣從子招福福斬之元兵攻城
久不拔貴至城下好語請單騎入城福信之門啟
伏兵起執福并其二子大淵大源福大罵數貴不
忠南向而死

鞏信安豐軍人為荆湖都統沉勇有謀文天祥開
督府信詣之官團練使督府都統制江西招討使

天祥自興國趨永豐元兵追之信戰於方石嶺中
數矢傷重不能戰自投崖石而死贈清遠軍承宣
使立廟旌之

元李冕潁州人至正辛卯劉福通作亂以紅巾為號
流劫鄉市冕率眾拒之被執罵賊死

李黼字子威潁州人冕弟泰定四年廷試第一授
翰林修撰累官江州路總管至正十一年徐壽輝
將丁普郎來寇黼部署兵民出戰身先陷陣賊大

敗黼曰賊不利於陸必由水道薄我乃以長木冒鐵錐於杪暗植水中會西南風急賊舟果揚帆鼓噪而至遇椿不得動黼發火箭射之焚溺死者無算拜江州路都總管已而賊勢愈熾黼勢孤援絕賊薄城焚門而入黼叱賊曰殺我毋殺百姓賊刺之墮馬與從子秉昭俱罵賊死事聞贈淮南行省中書左丞隴西郡公諡忠文立廟江州

曹彥可亳人至正間妖賊起里中皆不知書羣趨

彥可家以刀斧逼之寫旗彥可曰我儒者知有君
父豈能為汝寫旗遂遇害事聞諡節愍

明李傑霍丘人從征有功調北征陣亡贈鎮國上將
軍

梁文潁州衛世襲指揮同知正德七年流賊圍潁
上勢張甚文率官軍迎擊戰於蓮花鋪奮勇陷陣
所向披靡已而賊衆大至衆寡不敵力戰死之詔
加優恤陞其子為指揮

曾翀字習之霍丘人嘉靖己丑進士授南京刑部主事改御史彈劾不避權勢且論汪鉉罪上罷鉉而惡翀疏中有諍臣杜口語杖之垂斃曰臣言已行臣死何憾竟死追諡忠節

張鶴鳴字元平潁州人萬曆丙戌進士授歷城縣知縣歷遷貴州巡撫兵部右侍郎總督陝西三邊晉本部尚書引疾歸復起南工部尚書安奢構禍再授節鉞視師五省懷宗初予告回籍八年流寇

攻潁捐金募士授兵登陴城陷被執罵不絕聲備
極楚毒而死時年八十五子大同字同甫寇至
匿諸弟他所獨隨父見父死伏尸號慟罵賊以死
合家男女殉難者十數人

張鶴騰字元漢鶴鳴弟萬歷乙未進士授潞城縣
知縣調榆次值歲饑煮粥躬親散給投藥施耨收
育棄嬰後皆以張為姓徵戶部主事擢郎中累陞
雲南副使請告還里流寇至與兄鶴鳴督戰守禦

城陷死之

王印字雲卿潁州人工五字詩築慧湖別墅游處
其間旁有廢塚或勸平之笑曰此亦吾隣也作隣
墓記刻石護焉更創宗祠以聯族凡冠婚喪祭一
以古禮為法流寇至以善射守城及城陷縊於城
頭柏樹以死

劉廷傳字惟中潁州人九光從子為諸生狀貌魁
梧任俠好義萬厯末揚應龍反播州調兵及潁潁

兵不願行將殺護行尉為亂廷傳乃攜酒脯邀於
郭外相與雜坐飲啖以微言動之且為保任其家
室衆感悟崇禎八年流寇入潁州易衣冠拜祖廟
遣子體仁速去賊至瞑目叱之遇害

劉廷石字洞甫九光子博通古今書善策事公卿
咸欲薦之曰吾不欲由他途進流寇薄潁廷石守
西陴竭力堵禦賊乃由北門入被十餘創輿歸伏
枕猶口授其兄廷榜及學正周逢泰數百言令繕

牘乞隣道兵殺賊遂絕

甯儉字堯光潁州人中立子貢入成均以假還里屬流寇熾甚乃散家財募戰士得二百人寇薄城命長男印昌率義勇出南城禦賊賊轉至北據高樓攻城而城陷矣僕從勸其引避儉不聽與妻楊氏端坐堂上賊至厲聲大罵夫婦同時遇害幼孫龍亦殉焉

韓光祖字肇華潁州人進士獻策之父宿儒碩學

流賊至被執脅使跪叱曰吾生平讀書止知忠義
遂大罵賊怒碎其屍妻妾俱死仲子定策字五雲
見父遇害手刃二賊被殺孫日曦亦罵賊死

劉大濟字汝楫潁州人為名諸生潁陷於賊至西
七里河自投於水而死州人私謚曰節慎先生

王聘汝字起莘潁州人母時氏殉難聘汝憤甚糾
集鄰壯數百人殺賊力戰於楊家店自己至酉身
被數十創死

陳繼信字鳳津潁州人工趙仇諸家畫法年六十餘有童騃狀平居自謂善刀劔買一刀刻殺賊報天子五字於柄上賊至結束精嚴或謂其老宜自愛曰公故不知我一命須數命為抵城潰持刀擊賊於南城傷五六人刀折遂見殺

郭三杰字荆門潁州人年四十舉於鄉居近北門流寇至登陴助守見西北隅潰投黑龍潭死

鹿勁字建功潁州人生負神勇善騎射流賊攻城

衆推勁守北門賊附而上者擊踣無算近郭有高樓俯臨雉堞賊登之矢石交下城破猶巷戰殺賊賊蜂擁而至勁孑身無助中十餘矢乃斃賊怒鬻割肢體殆盡事聞祀忠烈祠

李從師潁州衛指揮同知領兵二百守城城陷獨身轉戰受十三創而死

王廷俊潁州衛指揮僉事防守西門射一賊中額賊識其面城陷磔之

田之穎大理寺右寺副 李生白光祿寺署丞同

妻韓氏 李元白光祿寺署丞同妻王氏 楊南

陝西會寧縣知縣 劉道遠封文林郎浙江黃巖

縣知縣 丁嘉遇四川夔州府學訓導 李茂叢

貢生 楊得坤貢生 王之麒潁州衛千戶 孫

陞潁州衛百戶 羅元慶中所百戶 田之振潁

州衛百戶 田得民中所百戶 汪檀前所百戶

尚日濟武舉人 李承訓武舉人 汪邦弼候

選經歷 李維紀諸生同妻趙氏及子女一家十

八口投井死 王致志諸生同妻唐氏 田大生

聞于階 聞于邦 王國泰 元鳳翔 卞文

斗 王乾亨 丁嘉運 劉棡 姚克智 丁崇

先 郭之英 姚同寅 尚日恒 陳純 李孕

生 王致和 申華 郭之豪 田之萃 郭璋

馬負圖 錢人璋 盧元貞 馬窠國 馬柱

國 韓中佐 揚于世 王啟昌 邢元錫 熊

叶夢 王維新 李汝珽 盧傳世 喻天叙

揚士貞 郭之產 郭獬 賀嘉貞 聞慎言

十四

一人俱 王文煥 田之蔚 田之茂 田之尹

四人

俱監生 張濟民 醫官 孔道隆 祀生 田之蕙 丁振先

二人俱儒

士 芥中元 嚴克長 王尚廉 芥旋 祁標

王公枋 六人俱處士 張肅範 王之幹 趙謙 祁瀛

潘守仁 汪茂椿 張思明 黃國 八人俱商民 王

九成 工人 自田之穎至王九成并妻女家口共一百

二十二人皆潁州人死乙亥寇難

周應正武平衛人正千戶由武舉任浙江都司倭寇犯杭州應正募得義兵千人趨賊營斬首百餘乘勝追至黃山寇突出四面攻圍正力戰被鎗陣亡題奏立祠贈本衛指揮僉事

雅元聲亳州人孝廉流寇至毫脅之從聲曰吾登賢書委身於國豈肯作賊賊怒殺之並及其子

秦培篤太和諸生崇禎八年流寇至與妻王氏俱

被獲賊首欲用之篤曰吾朝廷良士肯委身於賊乎賊又令其叩頭稱千歲即釋之篤植立不屈嚼齒大罵賊怒碎其齒斷其舌罵猶不絕夫妻同被害

秦思凡太人流寇抵縣被擒即驅之攻城凡大聲呼城上曰死賊無計攻城不過牛皮覆車以避矢石所懼惟火語未畢賊碎其首守城者遂以柴藁焚皮車城因得全

滁州

明吳得全椒人洪武中為龍里守禦所千戶三十年
古州峒蠻作亂攻城得乞兵貴州都司堅守以待
賊燒門急攻得開門奮擊中毒弩死贈指揮僉事
譚淵滁州人驍勇善射洪武中襲父勝職為燕山
護衛副千戶從靖難戰於真定及壩上馳騎突陣
斬獲甚多至夾河搏戰馬蹶被殺永樂初追封崇
安侯諡壯節子忠以淵故封新寧伯

方政全椒人勇略過人以靖難功累遷都督同知
充總兵官出鎮松潘叛番聽命逋亡復業移鎮大
同正統初進右都督征麓川援絕突陣死追封威
遠伯諡忠毅

周賢滁州人景泰初累功至都指揮僉事天順初
擢都督僉事赴寧夏寇二萬騎入賢擊之連戰皆
捷追至野馬澗中流矢卒賢初坐事下吏自以不
復用後釋罪感激誓死報竟如志贈都督同知子

玉字廷璧嗣職舉將材歷官至右都督

何洪全椒人襲世職正統中從征麓川景泰末從
征天柱銅鼓皆有功歷官都指揮使掌四川都司
事成化初擢都督僉事留四川趙鐸反數陷城殺
吏洪擒斬其將賊引去乘勝陷陣為賊所圍左右
跳盪殺賊甚衆力竭而死贈都督同知

和州

宋蔣子春歷陽人隱居教授建炎初北兵至新塘見

子春容儀秀整欲命以官子春怒罵被殺

陸有常歷陽人建炎初知臨淄縣抗敵而死事聞

贈官廕子

龔楫字濟道其先處州人父原崇寧中謫居和州
遂家焉楫懦如不勝衣聞北兵南下陷諸郡縣輒
忿恚不食誓以必死及北師築堡新塘楫率家僮
與鄉兵往襲之先勝後敗力鬪而死

明耿定和州人宣德中以薦辟歷刑部郎中有能名

出為浙江叅議正統十年處州盜起定引軍勦捕
率先督戰陷陣而死事聞贈按察使

馬如蛟字騰仲和州人天啟壬戌進士授浙江山
陰令清操皜然崇禎元年徵授御史以彈劾著直
聲出按四川預平安邦彥之亂八年冬獻賊犯和
州如蛟方里居傾貲募士與知州黎弘業登陴固
守麾壯士出擊賊兩戰皆捷會風雪晝晦守者皆
潰賊遂入城如蛟率士巷戰力竭被殺兄鹽運司

判官如蚪弟諸生如虹及家屬十四人皆死詔贈
太僕少卿

張元楨和州人官鴻臚寺序班歸里後獻賊攻城
分守北門城陷被殺贈本寺署丞

陳問世 陶應昌 陶應賡 姚承舜 趙世光

以上俱和州諸生獻賊破城問世以衛母見殺
餘悉掖母投水死

楊鳳墀 王良翰 王之節 宋鶴齡 成建中

李寅陽 郝萬秋 馬文卿 盛唐 盛美

以上俱和州人城陷鳳墀闔門殉節餘皆不屈死
俞應登舍山人崇禎中由貢歷即墨縣教諭獻賊
破舍邑不屈死

劉芳遠字芝南和州人崇禎十四年歲貢授嘉定
訓導十七年闖寇陷北都芳遠聞變哀慟整衣冠
北向拜畢坐明倫堂自刎

張秉純 徐正夫俱和州諸生聞北都之變秉純

絕粒死正夫自縊

廣德州

宋王汝翼建平人知廣德縣元兵入境汝翼死之

明夏魁暘字宿甫建平人以貢訓奉化攝浦江縣事
賊陷義烏及浦江魁暘誓衆登陴城破被執抗罵
不屈殞於池

六安州

明徐公輔六安人以軍功從太祖征陳友諒戰死鄱

陽湖中後贈東海郡侯廟祀康郎山

徐瑾六安人正統間為鄆縣丞處州盜起瑾率壯士邀擊數有功因援兵不至死之朝廷遣使優恤

廕一子

劉會字嘉會英山人正統乙丑進士官戶部主事
己巳北征主事羅紳當扈從適母病會與紳同年
相友善請代行土木之難遂罹害景泰初勅獎廕
子入監

劉世芳字穎玉英山拔貢生歷任廬陵宛平丞陞
新河令超擢濟南僉事未至任甲申三月流賊陷
京城得報仰天慟哭以頭觸柱嘔血數升卒

黃今度字國顏六安人明季壬午流賊攻城今度
破產偕紳士固守城陷被執諭以歸順今度大罵
誓不欲生賊怒以髮繫馬曳之而走力脫躍城濠
中四面射之皆不中溺死直立水中面目如生髮
指皆裂其弟今文亦殉難死妻徐哭累年亦死

張國正六安人世襲千戶陞指揮明季壬午流寇
襲城國正督衆巷戰中流矢死子斯美奔救亦死
時鎮撫陶賡明指揮劉良佐文學田呈芳梅國秀
霍山黃中理劉炫吳時道張大翼李懷信胡瑋江
源洞宋貞及時際順等均不屈節死

泗州

晉劉翼淮陵人衡陽太守永昌之亂起兵復晉祚力
戰死之

南北朝宋劉位招信縣橫山人靖康初率數百人勤
王將行會淮上盜起部使者檄位保鄉井盜畏其
鋒號橫山劉家軍建炎三年合兵收復滁州即攝
州事敵奄至城下出戰中流矢歿於陣詔贈建寧
節度使建廟於滁賜號剛烈

梁任孝恭臨淮人幼孤事母至孝家貧無書從人借
讀一過目略無所遺梁武帝聞其才召入西省為
司文侍郎文筆敏速每奏稱善侯景之亂不屈被

害

明耿再成字德甫五河人從太祖渡江多著勞績累
陞行樞密院判官守處州會苗軍叛再成聞變即
上馬收兵不及迎賊痛罵遂被害追封高陽郡公
諡武壯子天璧見武功

井孚盱眙人洪武中鎮守龍里古州洞蠻林寬作
亂燒城門孚戰死贈正千戶世襲

李紹賢字崇德盱眙人正德丁丑進士授行人嘗

頌詔至徐州有中使席班首立命撤之中使愕然
去諫武宗南巡廷杖死嘉靖初贈御史

姚允恭盱眙人由貢任霍山訓導教士有方秉性
剛毅值流寇臨城冠帶坐明倫堂罵賊殉難事聞
贈國子監學錄

王養正字聖功州人崇禎元年進士歷官南康知
府殲巨寇鄧毛溪熊高一方賴之後分巡建昌城
破被執死

陳濟世字斗華五河人由歲貢任沭陽縣訓導致仕歸里崇禎十六年流寇破城縱兵肆掠濟世曰為國諸生不能殺賊當守不能守當死忍坐視其淫掠乎遂整冠帶同妻趙氏坐明倫堂罵賊而死國朝周永緒字繩武盱眙人順治六年進士為廣西副使遇寇殉難於平樂

贈光祿寺少卿

江南通志卷一百五十六

欽定四庫全書

江南通志卷一百五十七

人物志

孝義

一

江蘇二府

江寧府

南北朝梁陶子鎬字海育秣陵人兄尚為倖臣所怨
被繫子鎬公私緣訴流血稽顙兄乃得釋居母喪
時與范雲隣雲每聞其哭聲必動容改色欲為申

薦母嗜蓴沒後常以供葬後忽營蓴不得悲慟幾絕遂長斷蓴味

陶季直秣陵人早慧祖愨祖宋廣州刺史嘗以四函銀置前令諸孫各取其一季直時年四歲獨不取曰若有賜當先父伯不應度及諸孫五歲喪母哀若成人聞者酸感及長好學淡於榮利徵召不起時人號曰聘君仕齊為尚書比部郎累遷給事黃門侍郎素清苦家徒四壁歿無以具殯歛著京

都記

朱年秣陵人母死廬墓終身有白兔紫芝之異鄉人名其里曰孝感至今有朱年隴

江紉字含潔考城人居金陵父病目紉侍疾經年夜夢一僧告以飲慧眼水乃可差及覺訪智者法師啟捨牛屯里舍為寺以慧眼為名心已異之及就初造泄故井井水清冽取以洗眼因此遂差後父歿竟以毀卒

張松建康人弟悌坐罪當死松訴稱後母惟生悌
松長不能教誨乞代悌死次弟景亦請死悌亦引
分讞上梁武帝以為孝義特宥之

徐雄秣陵人位奉朝請母終毀瘠俄而兄亡扶杖
臨喪一慟而絕

唐張常洵句容人父卒廬墓墓側生芝草十二莖從
孫公挺亦以孝聞

宋包級父為人殺級年十七與弟綉挾讐雙目瀝血

祭父讐家訟之官義而直焉

嚴晃溧水人舉進士授教諭時元兵渡江晃負母避之道遇兵欲刃其母晃以身蔽為兵所傷幾斃草廬吳澄嘗哀以詩

王景雲字仲慶溧水人學問閎博咸淳間以薦辟授清流簿與弟景華嘗捐貲周恤貧乏兄弟至老不忍析居

錢浩翁句容人幼孤事母盡孝有妹虜於北軍母

痛念不置浩翁遍訪得諸萊州携妹省母時母年八十有三喜甚鄰里皆賀又十年母歿浩翁年七十終喪不御酒肉不脫巾經

張孝友句容人讀書不仕親歿廬墓六年嘗有五
色鳥來集墓樹平居以德化人鄉俗一變

伊小一與劉興祖俱溧水人割股被旌

元樊淵字德翁句容人至元中奉母避兵茅山兵至欲殺其母淵抱哭求代兵兩釋之母亡終身不離

墳墓

王榮句容人五世同居庭無間言歲饑賑貧斃死
為德鄉里延祐間詔旌其門

王進德字仁甫家金陵富而好施出七萬餘緡構
郡學講堂置一切禮器又買宅一區割田九百畝
創建江東書院朝錫以額設官掌其教置義庄以
贍族修城隍以捍井里

顧童子建康人割股愈母而已死

明周琬江寧人父為滁州知州洪武時坐事論死琬年十六叩闕請代上疑為人所教命斬之琬顏色自若乃宥其父戍邊琬復請曰戍與斬均死耳父死子安用生為願早就戮上怒命縛至市琬色喜上察其誠赦之親署屏曰孝子周琬尋授兵科給事中

徐鎮童上元人洪武時旌其孝

魏澤字彥恩溧水人洪武時為尚書建文時謫海

寧尉文皇逮方孝孺族黨澤陰脫其幼子宗甫密
致于台州秀才余學夔孝孺得有後又有陳義者
陰庇鐵尚書鉉二女脫教坊籍亦義士也

浦阿住沈得安嚴分保三人俱江寧人又邵佛定
上元人皆永樂時以孝旌

李疑江寧人家貧好周人急金華范景瀉為部吏
隻身得疾無肯僦舍者杖而詣疑疑延入汛室居
之躬為煉藥煮糜瀉有黃白金四十餘兩願以酬

疑疑不受籍藏之馮死出已財殯之聚寶山招其子至按籍還金平陽耿子廉械逮京師其妻孕將育衆拒不納卧草中以號疑謂婦曰人孰無緩急倘為風露所侵則母子俱隕令婦邀歸產一男踰月辭去宋學士濂為之傳

陳達六合人舉將才李時勉薦之歷都督同知天順復辟于謙棄市故人僚友皆畏避不敢出達感謙忠義獨收遺骸殯之得歸葬

王指揮失其名世襲虎賁衛妻死不娶獨與母居
同官黃某遠謫久無耗妻貧不能存成國朱公儀
素愛指揮憫其喪耦令納黃婦指揮唯唯而已成
國擇日歸之居數月聞其寢處各異召訊其故指
揮曰曩以主命不敢違但與婦同寢其夫歸何以
處之况彼失節是某失節也成國曰然則奈何曰
不若遣送謫所某家有老奴夫婦二人可伴之往
成國嘆賞從之

顧暘江寧人正統時旌孝

胡深六合人天順時旌孝

戴睿句容人七世同居成化時旌

鄭濂字師周江寧人嘉靖癸未進士為行人兩使
藩封餽遺一無所受授山東道御史按兩浙有能
名為湖廣按察使以父憂歸乞致仕養母盡孝母
卒濂已老哀毀踰禮里人著純孝傳以稱之

沈九思字天啟上元人副使琮子父病九思籲天

請以身代嘉靖癸酉舉鄉試罹母憂哀毀骨立里
中勲貴為黃門所持橐千金求九思為解九思拒
其金而陰解之未仕卒伯子鳳翔進士為蕭山令
以廉能課最遷給事中

徐昱字彥昭江寧人父病革醫告技殫昱旦夕顙
天求以身代剗臂肉和糜以進父疾瘳鄉人將以
聞部使者昱曰此一時遑迫之計無復之耳奈何
從邑長令干名乎後舉宣德七年鄉試為國子助

教

徐遠字文穆上元人友人寄一篋內藏白金奇玩
夜失火友人已甘灰燼遠往探之尚在於已物不
及携獨完此篋以歸友

蕭春字秉常居金陵父病痢春祈求備至及疾革
臭穢狼籍春泣曰吾父不復生矣兩手據床一吸
殆盡悲苦氣絕良久乃甦父歿廬墓

徐震字廷威家金陵不侵然諾有兩人皆密以金

託震授其子兩人遽死其子皆不知父有金也震如數還之一無私焉

龍景華字春上元人少孤奉母教母病危剗股以療嘗至江澣捐金拯溺活十六人鄰火藝所居叩禱風返火息有司奏旌其門為孝行

姚澗上元人割股療母疾嘗拾遺金候其主不至盡出以周貧乏

史世揆江寧人人貸其父千金貧不能償析產時

世揆遽焚其券嘗納妾入門悲痛不已詰其故曰
父寃繫獄鬻妾贖罪念母無依耳揆立遣還更厚
贈之

何岳字畏齋夜行拾遺金二百鏰不與家人言凌
晨携至故處有尋金者詢其數目封識皆合遂還
之其人欲分數金為謝岳曰拾金而不隱豈利數
金者乎

趙時振字少東江寧人舉鄉試以哭母成疾死葬

康家山有碣曰趙少東先生廬墓處

張諫字孟弼句容人孝事二親由進士筮仕行人
司丁母憂哀毀骨立廬墓三年芝產墓旁遷河南
副使召為順天府尹以忤時貴出守萊州政聲大
著召為太僕少卿

王馮字杲清父芝瑞任四川學道沒王事藁葬瑞
州之梅庵馮家赤貧重繭迎柩時六合潘士奇與
芝瑞同官同患難同葬梅庵又有故廣東御史顧

之俊與芝瑞交厚瑞歿時之俊為經紀其喪而身死柩亦停於庵側馮并舁歸葬之

王之藩字南衡江寧人兄某領官錐采銅耗其貲藩毅然鬻產得千八百金以輸官當事義之任陝西藩幕榷稅潼關攝華州篆皆有惠政

黃居中字明立萬曆乙酉舉人教諭上海不受生徒私贖陞南國子監丞轉黃平知州投檄不赴持身介特族人為南大司馬有營弁以千金請托者

居中曰奈何以此失吾生平麾之去

王潢字元倬江寧人孝友能文章舉崇禎丙子鄉試親老不仕賦南陔詩以見志一時名人屬而和之人稱南陔先生

陳敦化秣陵人母老卧病土寇為亂化獨守母不去寇劈門入執化索賄繫於樹連射之備受楚毒惟以身蔽母未幾所傷竟痊咸謂孝誠所致

周禧句容人拯溺人還遺金

梅洪溧水人少孤事母以甘旨自奉甚約其婦有
後言遣之母瞽洪負以行一旦復明人以為異母
卒廬墓三年縣令聞而賢之為娶妻生子矣婦厭
其貧去之數歲子卒洪亦卒邑人收葬城北十里
許有監司題曰孝子梅洪墓

花犇孝子高淳人不知姓名日負薪以市嘗雪中
至學宮教諭于鳳見其衣敝肘露謂曰何不以薪
價易衣對曰小人有母不暇自謀也鳳曰汝有妻

乎曰有何以衣妻曰新者奉母而易其舊者聊蔽體耳鳳喜其孝贈以千錢不受固與之乃曰當為公供薪鳳堅辭之至夜則載而投學舍園中

楊師祿高淳人遇亂兵父被執師祿號泣請代兵異之欲留置軍中不從被害妻卞氏年二十守遺腹子以終

吳翥南高淳人崇禎末隨父避亂土賊入門劈父胸翥南樓上望見急下求代被害妻孫氏守節割

股療姑

劉銓江浦人父觀為御史坐事當辟銓具本擊登聞鼓願以身代蒙特宥復觀原職

陳標江浦人年五歲生母李氏為父所遣改適於浙長欲尋求以父老不果父歿詣浙迎母亡已十餘年遍訪遺塚啟棺滴血負柩歸葬

吳可箕上元人監生甲申闖賊陷京師可箕具酒食召親友言別衆莫測其意已乃製白衣題詩於

襟入英靈坊闕廟闔殿扉自經死同時有孝陵衛
董啟明武舉黃士彩聞變皆自經

曹臺望江寧諸生寇亂捐千金倡修城垣嘗夜宿
淳化鎮聞鄰人以債迫棄其妻即傾囊贖還之

魏孝楞高淳人親歿廬墓楞歿子亦然勅旌父子
雙孝

王之卿應天人崇禎時旌孝

胡陽生字復之上元人輕財好義歲暮日袖金數

十封伺途中奔走憂惶者與之問姓名不答崇禎
十三年間歲荐饑疫倡捐賑施醫藥收棄嬰給
棺槨所費不貲寧陽侯陳光裕勢奪陽生祖墓地
擊登聞鼓訟諸朝卒復之孫任輿

姚金玉 張繼宗 馮天孫 陸元龍 陳鑛俱

上元人 倪壽 江元孫 張福緣俱江寧人

史負八 葛至學俱高淳人 黃阿回水軍衛人

徐佛保江陰衛人俱割股療親疾以孝旌表

楊佐上元人甫成童母病劇剖腹取肝和粥以進
母獲愈後三日佐卒所居隣辟雍祭酒程松溪聞
而異之殯之日令太學生數百人送其喪

千戶劉潮子文縉割股愈潮縉疾子天命亦割股
療之

戎憲句容人幼喪母事父哲孝每食必問所欲哲
患痢憲割股以進遂愈叔孀無嗣憲奉養如已親
張一鵬句容人年十二父病劇鵬焚香籲天割股

以進

吳方明句容人每旦刺舌血書法華經至千餘卷
為母祈壽從弟方魁亦孝母母病刲股愈之

袁文化溧水人父死廬墓九載三十喪偶終身不
娶鄉人贈以詩有三十鰥居敦大義九年廬墓重
天曩之句

丁滌溧水諸生事母孝母歿廬墓哀毀踰禮邑令
王弼聞狀三過慰之撰丁孝子廬墓記

陳宗堯高淳歲貢新城令與同邑周庖劉一俊施
龍庠生魏暉溧水傅褒庠生楊振六合毛程江浦
王海皆親歿廬墓三年

顧夢窠上元人同邑沈昇王萬禛吳淦王頊李仕
傑張繼宗六人句容徐延雄馬獻圖李長標三人
溧水虞欽黃振任超庠生虞周四人高淳鄉貢邢
振羽陳希任湯之尹九歲童子孔允紀四人六合
方顯黃閻王岳毛至潔陳應登庠生許忠汪國淞

沈希孟八人江浦周思臯一人俱割股療親疾以
孝旌表

汪應乾右衛指揮陳名謨名世俱上元人揚鳳江
浦人李夢周六合人皆割股療親疾

劉鳳池溧水人 庠生馬純仁六合人俱以流賊
入都赴水死

蔣凡順德府別駕張愬僕也愬居官勤慎偶墜馬
不能言凡泣走告太守曰吾主飲順德一口水積

貸未償今若此行囊請封貯使人知吾主為清白
吏語畢引刀割股以進顓天願代少間慙稍甦太
守義之為作傳

增華瀨水劉道開之僕道開補崖州幕偕其弟及
二客三僕往海邦瘴癘二客二僕相繼死乃遣其
弟還而道開又死獨增華瀨死復生間關萬里扶
五柩歸出百金奉主母封識宛然曰此主積俸也
襆被蕭然衣不掩胛

國朝劉玉佩江寧人割股療父以孝

旌表

朱獻醇原名朝幹句容人順治甲午鄉試第一授
射洪知縣在官潔清居家孝友嘗請於當事除邑
中龍潭運糧及區頭之困邑人德之乾隆元年崇
祀鄉賢

駱維持句容監生施德鄉里康熙丙子秋暴水漂
漲維持殮死賑生其事尤著子如驥邑諸生性篤
孝歲饑賑粥捐貲修建奎文閣明倫堂事載廟碑

羅必顯字揚庭江寧人事親孝家貧不受人憐嘗
夜歸過螺南巷口遇以索債投繯懸而未絕者救
甦代償其債孫秉侯有孝行母喪廬墓三年

董志聰江寧人明季顛憲重建預備倉九十三間
于賽洪橋寇氛時捐金賑濟贖人子女又有築圩
堤造義舟諸事

鄧良材字干霄江寧諸生讀書過目不忘潛心理
學動循規矩嚴於辭受非義之干介然弗屑也明

亡後絕意進取杜門謝客親故罕覲其面子士傑
順治辛丑進士

張光字樸生江寧諸生敦信義友人謝願小計偕
道卒光撫其孤如已子陳君昱死光為其女擇配
贍其妻終身子景栻庠生景載康熙辛酉乙榜令
興安多惠政擢刑曹

黃老人江寧庠生黃清家隸也清卒家貧子弱不
能具棺衾老人拮据殯葬之遂傭於他氏所得直

悉以供主母饘粥春秋伏臘必市豚蹄絮酒走清
墓哭奠盡哀

高官蔭上元人性篤孝四歲父病痢不食蔭亦不
食母病危藥不下咽蔭以口度藥夜則顛天請代
割股進之母愈蔭遂絕粒死時年十六其後十八
年母年七十七乃卒 雍正十年 旌表

裴師度字述先上元人竭力養親雖一錢入必均
之同產養寡妹撫孤甥有陝客遺金於其室度鑰

守數年俟其來還之康熙己未歲祿斥產買穀以賑里人

程煒字闇章上元人性誠樸早喪偶不再娶侍父寢三十年親滌溺器裹衣垢必親浣父年九十歿煒老矣猶孺子泣云

錢士揚江寧人七歲母病臥樓下火起士揚聞之自塾奔歸抱母號泣火遂息母歿廬墓三年有白鳥結巢之異

談禮字慎修江寧人父如玉早卒母張苦節孝養
備至孤姪十人撫以恩代弟償逋千餘金立義田
以贍族完人之婚脫人於難歲終袖銀于途遇老
貧者贈之同里李之曉字君明嘗剗股療親散衣
糧施藥餌給樁瘞枯鄉里稱其好義

何澍字友筠江寧監生幼孤孝母讓產於兄施德
鄉里年九十八雍正三年 恩給八品冠帶三子
皆孝友

唐仲熊字虞臣江寧諸生父早喪事母孝母歿啜粥三年不入私室及葬每朔望必詣墓田展拜卒無子士友哀之

孫芳江寧人少孤事母盡孝居方山有虎患與弟必立捐貲募力士捕之殆盡又出穀以賑饑全活甚衆時上元謝之湘亦勉力為善

孫大倫上元人幼失怙恃哭泣如成人父遺貲數千金悉歸伯兄口不言貧生平尤多善事

馮起龍字雲生句容監生康熙辛亥邑大歉出米
千六百斛銀九十六兩作粥賑饑邑令刊名木榜
以示風勵

蘇州府

漢顧翽吳人少失父事母至孝母好食雕菰飯常率
子女躬自採擷家近太湖湖中乃生雕菰無復雜
草遂得日以為養郡縣奏表其閭

顧訓之吳郡人東漢時仕太原太守五世同居聚

族至百口歲時子孫依次行酒三歲以下並自知
坐次所居旁有橋吳人以百口名之又名試飲橋
臯伯通字奉卿官議郎吳中大姓梁鴻至吳依居
廡下伯通見其夫婦相莊心異之乃舍之於家鴻
卒伯通葬之要離墓旁

三國顧悌字子通吳人雍族子以孝友聞為偏將軍
孫權末年嫡庶不分悌與朱據共陳禍福言辭切
直待妻有禮不數見其面其父向厯四縣令每得

父書灑掃設几筵展書其上拜跪而讀之父終水漿不入口者五日以不見父喪畫壁作棺像設神座於下對之哭泣服未闋而卒

南北朝宋陳遺吳人少為郡吏母好食鐺底飯遺在役恒帶囊剥焦遺母方聚得數斗適遇孫恩亂帶以自隨時逃者多餓死而遺獨藉以活母晝夜啼哭致瞽遺還入戶再拜號咽母目豁然即明

陸絳字魏卿吳人閑子閑坐始安王遙光之亂為

徐世標所害臨刑絳抱頸求代不獲乃以身蔽刃
行刑者并害之兄厥字韓卿少有風概善屬文父
被刑厥坐繫尚方尋有赦恨父不及感慟而卒

張數字景印吳人邵子生而母歿年數歲問母所
在便有思慕之色求母遺物散施已盡惟有一畫
扇緘錄之每感思輒開筭流涕宋武帝召見奇之
曰千里駒也官祕書郎累遷司徒長史父在吳興
亡報以疾篤數往奔省至吳興成服凡十餘日始

進水漿葬畢不進鹽菜毀瘠成疾世父湛每止譬
之更感慟絕而復續未期而卒孝武時追贈侍中
名所居曰孝張里

梁陸襄字師卿吳人厥第四弟弱冠遭家禍終身疏
食布衣不聽音樂昭明太子聞其業行引與游處
出為揚州從事以父終此官固辭不許聽與府司
馬換解居之母猝患心痛醫方須二升粟漿時冬
月日暮求索無所忽有老人詣門貨漿量如方劑

將酬直忽失之時以襄孝感所致尋以母憂去職
年已五十毀頓過禮太子憂之遣人戒諭大通七
年為鄱陽內史時鮮于琮作亂襄率人吏破之生
獲琮案其黨枉直無濫時有人無橫死之歌侯景
圍臺城憂憤卒景平追封餘干縣侯

陳張種字士苗吳人仁恕寡欲識量弘博時人為之
語曰宋稱敷衍梁則卷充清虛學尚種有其風居
母喪年五十哀毀過甚迫以凶荒未獲時葬服制

雖畢恒若在喪時稱其孝

張昭昭弟乾吳人昭字德明乾字元明並有至性
父病消渴嗜鮮魚昭結網捕魚以供膳父卒兄弟
並不衣綿不食鹽酢日食一升麥屑粥每感慟必
嘔血父服未終母陸又卒兄弟毀瘠骨立家貧未
得大葬布衣蔬食十有餘年陳衡陽王伯信臨郡
舉乾孝廉固辭兄弟因毀成疾昭失明乾中冷苦
癖年未五十並終嗣息俱絕

隋徐孝穎吳人仕隋為校書郎嘗在園中晝卧見人盜菜徐轉身向內恐盜見之丁母憂三年不內宿終冬不御綿纊形骸骨立每哭哀聲徹於邑里聞者皆隕涕

唐陸南金字季孫吳人操履謹飭歷官太子洗馬嘗匿盧崇道按捕當誅弟趙璧出認抵罪兄弟交爭趙璧曰母未葬妹未歸兄能辦之我生無益願請死御史義之上聞並免初南金為鄆令築隄為湖

千頃宋治平中立祠湖上之青山

張承休吳郡人以南郊齋郎補兗州兵曹丁母憂廬墓三年又舉賢良方正遷揚州司錄叅軍

丁公著字平子吳人三歲喪母七歲見隣媪抱子哀感不食請於父願絕粒歸道父勉飭就學舉明經高第授祕書郎即辭侍養父亡負土作冢貌力癯瘠見者憂其死孝上聞詔賜粟帛旌閭官至太常卿清約守道每遷一官輒憂見顏色四十喪妻

終身不畜妾

龔景才字敷禮常熟人五世同居麟德初旌表

宋李鼈吳人幼孤事母孝天聖中母歿倚杖寢苫廬於墓側早夜悲慟甘露再降於松柏又以母嘗誦金剛經刺血為書刻於墓下郎中楊備表之

范純祐字天成參政仲淹子十歲為文章有聲仲淹守蘇州聘胡瑗為學宮師瑗學規良密生徒多不率教仲淹令純祐入學齒諸生之末盡行其規

諸生皆化之仲淹屢將兵關陝純祐與將卒雜處
得其才否仲淹任人賴以無失仲淹城馬鋪砦虜
侵撓其役純祐率兵直據其地且戰且築數日而
成性至孝未嘗違左右不應科第及仲淹以讒罷
乃就將作監主簿又為司行監尋解去從仲淹之
鄧得疾廢卧十九年而卒曾孫之柔第進士歷禮
刑二部尚書封崑山縣開國子奉親事君一以仲
淹為法純祐從兄純誠仲淹義田皆純誠辦理因

奏為長洲縣尉俦規條以貽永久

陸十七吳江人父病剗心作糜進啖隨愈郡守趙
汝厯為建旌孝坊

龔明之字熙仲吳人少逮事祖母李李自言嘗夢
神告曰與汝七十七及期果病且革明之夜禱於
天乞減己五齡以益李壽灼香於頂者七聞腦中
有爆裂聲不為動詰旦李病良愈又五年乃卒宣
和時貢京師迎父母往已而母與弟相繼亡去鄉

數千里貧無以葬明之自一錢之直皆折賣之又乞貸於人竟獲歸二喪晚授高州文學年逾八十參政錢良臣奏其孝行節誼於朝超授宣教郎賜緋衣銀魚致仕生平不摘人短不作貌言每自謂平日受用惟一誠字撰中吳紀聞三卷子昱字立道有學行安貧樂義鄉人師之

張柎字材仲吳人宣和初登第歷官朝散大夫性至孝母卒年九十九柎亦七十矣執喪甚至初得

郊恩捨子子姪族人有喪不能舉者哀而葬之

范正平字子夷吳人僕射純仁子學行甚高紹聖中為開封尉以執法忤蔡京後京當國遂構遺表之獄正平當就逮弟正思請代曰是時兄方營窀穸參預筆削者正思也正平曰時相意屬我且我居長我不往兄弟將俱不免不若身任之遂就獄捶楚甚至及事白猶羈管象州遇赦得歸初純仁卒特添恩澤官及中外諸孫久之追奪例外官正

平遠納其子官全其姪與甥焉正思字子默學行亦為士林所推

陳振字震亨崑山人父歿貧無以葬得地圓明村卜者云不利長子振曰使親藏得寧或不利於振二弟尚可主祭遂葬焉後振為紹興進士以祿不逮養刻木為親像一飯必祭弟拱亦登端平科

周津崑山人治詞賦端平嘉熙中兩舉待補進士父有疾封股以療或以義諭之津曰父母遺體豈

宜毀傷然因所予者還以奉之詎為過耶又有曹椿年者母病刲股療之事聞詔補承信郎立孝感坊又淳熙八年有榮孝子亦以刲股救母建旌孝坊其後有張孝子皆同縣人也

元陳訓訓弟謙訓字思敬謙字師平吳人訓仕江浙行省照磨為吏廉嘗以乘馬書畫器物鬻錢屬所知營什一自給所知死其妻操錢還訓訓曰生享其利死餒其孤吾不忍也悉以錢與之及歸貧甚

謙力苦周旋以奉其兄謙初師林寬龔璠就場屋
試兵卒搜簡無狀歎曰待士如此尚何徼倖得失
為哉即棄舉子業折節讀書尤善詩賦虞集黃潛
張翥皆論薦力辭張士誠兵至吳訓謂謙曰汝無
官守宜自為計謙曰兄在吾何所之俄而兵入室
脅訓使拜不屈遂刃其胸謙以身蔽翼之並遇害
門人范文炯求屍得之水中猶兄弟相挽結

趙良箴字順卿常熟人父必鑛為海州節推歿宋

季道路多梗良策侍母行備經患難卒以柩歸元
大德間東土大饑以粟二千石助賑延祐間又助
賑四百石都省旌之

曹善誠常熟人至順間獻糧萬石助國用建文學
書院祀子游割田二千六百畝給師生廩費黃潛
楊剛中有記

吳淳字伯善長洲人兄疾伏枕二十年元季吳中
被兵人悉奔潰淳獨侍兄不去有操刃入室者乃

負兄走避復遇亂兵交刺淳以身蔽兄被三十餘
創昏仆於地兄竟兵死淳稍蘇遂入秦餘杭山以
終

金弘業字修可吳縣人居濱太湖羣盜出沒弘業
結民兵保障鄉社方國珍亂其黨剽掠吳中弘業
遣孫榮一榮三拒之皆力戰死越月寇又至弘業
逐之於黃洋灣殺獲無算一境無恙江浙行省上
其功授義兵千戶

陳晉字次翁吳江人元末偽吳竊據父作詩坐謗
訕論死晉請以身代之父子爭死有司曰代父者
孝存子者慈慈孝之人安肯訕上兩釋之父病死
既葬猶朝夕哭一日喪明

朱良吉常熟人母病且死良吉沐浴禱天剖胃取
心肉一爨煮粥食母母病愈良吉心痛不可起邑
人俞某聞而過之觀良吉胸間創裂五寸氣騰出
不能言俞為納其心以桑白皮線縫合月餘而愈

明瞿嗣興字華卿常熟人母嘗夏月患癰穢不可近
嗣興燭湯洗滌跪牀下執扇驅蚊磨穢剔腐晝夜
不少休母又嘗患積氣不食封股作羹進之疾遂
愈母思食芟時芟始花求諸市不得嗣興解衣入
水忽得三芟人稱孝感所致

宋通字文傑長洲人為元萬戶侯嘗施家貲保障
一方洪武初舉賢良方正不赴嘗曰吾家世有隱
德不敢望富貴吾子孫得為善人永保詩書之澤

足矣吳寬為之贊妻沈氏富民萬三女也預知家難妝奩概辭之時稱奇女子

虞宗濟字思訓常熟人洪武時父與兄坐法當死乃詣吏自任曰父兄不知也獄具斬東市顏色不變年二十二宋濂有論贊

徐植字原芳常熟諸生父掌鄉賦後期將伏法植引為已罪臨刑賦詩曰父母恩同日月高試將一死報劬勞邑人王廷珪作孝子傳又同邑張巽洪

武間弟當遠戍以弟幼恐貽親憂代弟戍貴州

錢迪常熟人洪武初其父沂坐法論死迪年十八詣闕請代詔刑迪赦沂沂出乃易名甦字更生後徵詣京師應詔撰祭元幼主文上喜欲官之以老辭賜杖歸從子完感嘆迪孝立祠祀之

莫轅字吳仲吳江人洪武初父繫詔獄將刑轅年十一願代父死理官誘脅無異詞遂奏釋其父而繫之後獲赦季父侍郎禮有寵於上轅憂之每指

同姓一人隸洱海衛者曰是吾族也後黨禍一家
無免者獨轅嘗以附尺籍免兄嫂以家禍病死有
遺孤二皆在襁褓轅為保護甚至家被火逼母寢
躍入火中抱持以出鬚眉盡焚年七十七卒私諡
貞孝先生

戴君用長洲人洪武初父福之因監稅失火法當
死君用身代父刑其妻吳氏泣曰吾夫得子道而
死吾忍失婦道而生子文禮方襁褓紡績以養守

節五十年宣德三年旌表

蔣安字仁伯常熟人弟懋洪武中犯法謫戍開平
時安為諸生去巾幘詣御史泣曰懋幼弱不任戍
且老母所鍾愛請以安往御史許之

范廷珍字惟中崑山人洪武中父以事連坐廷珍
率其弟廷珪詣官陳請願代父死情詞懇切官為
感動得未減兄弟俱戍河間廷珍故善醫遂以醫
濟河間之人晚年學益該博喜吟咏字法歐陽年

九十餘猶日作數十紙葉盛為紀其事

顏琇字季璵吳縣人洪武初父戍鳳翔母從行留
琇守邱壘越六年聞母訃即日奔赴函母骨以歸
自陝抵吳踰數千里骨函未嘗着地行則負之寢
則懸於屋梁渡則着之心胸父既老免歸奉養愈
謹必躬滌園牖家人止之躬滌如故父故不知也
父卒日夜號泣水飲不下咽者五日竟哭死子昌
亦有孝行

都文信字士誠吳縣人其父思賢與徐右之交善
思賢死妻唐有娠日夜悲泣右之日使人存問且
慰之曰若生子吾當妻以女已而果生文信右之
遂館為壻洪武初右之坐事文信請代行右之曰
汝未有子豈可為人死不許既而右之事實得還
後復以事被逮文信曰今已有子可行矣右之仍
不許文信潛冒右之名以往竟死於獄右之感其
義即屏妾侍遂以無子都氏世奉其祀

沈伯剛長洲人本孟姓自幼為沈勝五後勝五坐
事當誅年且老伯剛願代死勝五不許伯剛固欲
代之時年方十七臨刑太祖怪其少問故特赦之
又朱昱亦長洲人父當遠戍老不能行而兄先逃
去昱年十六請代徃有司少之欲追逮其父兄備
受笞楚固請代部使者憐之改留蘇衛

盛逮字景華吳江人弟以鹽法被捕父憐其少不
忍遣逮曰弟未有子願就捕因謫戍寧夏衛

吳璋字廷用吳江人幼孤依母陸以居永樂二十一年詔選天下節婦充內役陸以年例當行宣德元年親王出封廣東徙饒州陸皆從行璋棄家奔走二藩間屢求見母不允正統十二年復懇於王憐而許之命入宮見母母病已革璋徬徨割股作糜以進病少間遂負母出至寓三日而卒扶柩歸葬梅里璋年至八十一以子洪貴受封時同邑梅衡求得父屍於沔陽錢抱璠吮父疽而獲愈俱以

孝稱

王賓字仲光長洲人博學洽聞於書無所不讀尤精於醫然未嘗與富貴人醫里巷貧人及方外士即往診視與之藥絕不望報貌甚寢藥點其面及肘腋為創鬢髮短衣人咸笑之生平不娶未冠父歿終身不冠奉母飯必親煮羹必親調年七十疾革抱母不捨息半晌復蘇呼母連聲始絕葬後魂歸於家曳履拄杖行呼曰娘娘舉室皆驚良久乃

滅初郡守姚善賢而造之賓掩門語曰勿驚吾母
踰牆逸出善他日却儀從獨候門下始接焉所著
有光菴文集

梁棟崑山人父為館陶主簿將歸留少子鎬贅於
邑人其母嚙臂而別父母卒棟思鎬徒步至館陶
已失主家所在後隨處求之垂三十年一日在華
亭東禪寺會大雨有僧袒而決渠臂有嚙痕棟見
心動就與語即鎬也抱持大哭携歸友愛終身

徐季昭吳江人永樂中兄昌伯坐事戍遼東乃請
兄留養而以身代行昌伯曰爾年少不更事豈堪
遠戍二人互爭久之母竟遣季昭行後十餘年季
昭還母尚無恙鄉人扁其堂曰孝義

徐真字宗正吳江人靖難兵起避亂與母相失去
家訪之立誓曰不得母不生還後數年渡淮得之
奉以歸

杜瓊字用嘉吳縣人生一月而孤母顧育而教之

長從陳繼學為文必本於理詩古雅有風致間寫
山水秀潤可觀性至孝痛父早亡從母問其容儀
徃徃形諸夢寐母疾刲股以療有司將上其孝瓊
曰此豈得已耶惟念母節未白耳正統四年知府
况鍾疏聞被旌宣正間有司薦瓊孝廉辭不就年
七十九卒遠近會葬者千餘人私謚曰淵孝五世
孫詩字與言嘉靖己酉舉人歷官貴寧道叅議定
烏撒烏蒙爭地界事

王鑑字與修崑山人舉天順壬午鄉試其學邃於尚書謂二帝三王之道在此大書忠孝二字於壁間成化辛未上春官卒遺子漳書曰而祖以千金付我汝仲父二孤尚幼我緘而藏之某柱下書到即付孤去無他囑勉思壁上二大字而已漳得書發柱不開緘而與之時稱其父子雙孝

張曉初吳縣人以無子娶良家女見其舉止端凝詢知父為廣文喪不能歸售女以備行李曉初即

返之已發矣乃令妻撫之擇婿嫁焉後曉初生子
習舉成化進士

顧寬字惟仁吳江人性孝友母喪三年不入私室
與弟宏俱八十餘歲不分爨族之貧無依者不能
葬者皆必有賑給嘗買地掘得故冢復掩而他擇
之曾孫名曾唯嘉靖癸丑進士為名御史

朱顥字景南長洲人父歿廬墓三年每哭烏烏聞
聲皆下事聞旌為孝行之門又有陸銓十歲喪父

哀毀如成人兩遇盜負母出哀呼曰母令吾母受驚也盜舍之去

鄭熙母孀居四十年熙曲順母意至老如孩穉時母愛季弟子婚娶俱先已子

吳中英長洲人父客燕死僕竊金逃中英遺腹生未識父長尋父櫬三往不得最後號慟欲絕誓不得父棺不還德州僧指示之題識宛然奉歸葬焉同邑杜遵家貧傭力養親父母相繼歿手自穿

窶負土以葬鄉人繪圖傳之

顧淳長洲人年弱冠父患痛風不可忍呼淳與訣欲自裁淳禱於天剪髮際肉投藥以進痛立愈同里顧愛石幼值母病夜半赴神廟哀籲剗右臂肉母愈父病剗左臂肉亦如之

鄧汝南長洲人力貧養母妻以語言觸母遣之終身不娶母病剗臂肉既歿肖像事之如生存

金孝子失名長洲人居甫里父未疾不能行有所

詣即負之家火災倉皇中婦已負翁出孝子不知
冒烈焰入焚死

孫雲字從龍崑山人父客死雲徒步萬里得父骨
於昭平堡函以歸將渡江旋風忽起恍有物奪其
所函骨擲之江雲躍入江中行里許攫得之卒抱
函歸後登嘉靖己丑進士官員外郎

譚照字儒溪常熟人增例太學生與弟太學生曉
字鏡川三世同居嘉靖三十一年島倭入寇時邑

皆土垣知縣王鈇議築城費無所出照慨然倡義
捐貲四萬餘金親身督率晝夜併力不五月而城
工告竣甫三日倭猝至民憑堅城保守邑以無虞
邑又連遭水旱照散米賑饑全活無算又自東門
至崑山界脩築岸塍十萬餘丈建石橋十八座以
便往來撫按題請表揚時曉已卒照念祖父以來
三世未分所捐之金與弟共之因推功於弟曉得
建專祠隆慶元年照卒撫按又核其事行具題備

主入曉祠一體致祭時人為撰祠記

任環家卒名氏不傳嘉靖時倭寇薄蘇環以同知奉檄督鄉兵禦之兵市人子遇寇先遁環獨身射寇寇持長刀突至家卒見勢急扶環上馬寇刃及馬尾家卒直前手搏寇連中數刃死環得脫後竟成勦寇功又有鄉農二人方鋤田為寇所獲使導往富家二人故引之官軍處大呼殺倭倭殺之陸懋字邦美崑山人有姊父鍾愛也為倭所獲將

被害懋突城而下跪請代姊死以全父志賊感動
釋之令懋擔懋睨其姊去遠提擔撲賊賊追之田
間被害既死尸不可辨凡愚哭之哀瞑目閃閃動
與頸領合得藁葬城西

歸鉞字汝威崑山人早喪母父更娶後妻輒杖鉞
每炊將熟逐之出戶終日不得食比歸又復杖之
父死母獨與其子居鉞擯不得見因販鹽市中時
私其弟問母起居致甘鮮焉歲大祲母不能自活

鉞往涕泣奉迎母慚終感其誠懇從之鉞既老且死終不言後母事也鉞族子繡字華伯販鹽養母與弟綿綿友愛無間繡妻朱每製衣必三曰二叔無室豈可獨使君被完潔耶後叔妻亡有遺孤撫之如己子歸有光作歸氏二孝子傳

林德常熟人父為倭所殺訶知讎所在委身從之屈意善事既親暱乃具酒食誘倭醉卧取其佩刀斷首以歸

周伯字懷堂常熟人質直好義嘉靖間倭犯海上
令大戶築城伯獨任鎮海門一帶寇至伯率家屬
拒之獲三甲首辛酉大水輸粟千鍾粥餓者樁溝
齒御史旌其門曰忠義

沈楠崑山人七歲喪父力耕奉母母感疾疾楠割
左乳火煨為末點沸湯進之數進稍息屬盡乳而
甦知縣劉某旌之以文鄰里贈之以粟楠曰楠須
母乳以生今母病割以還母豈異事哉敢以一乳

為名高也力耕如故每盛暑必以半臂掩之不令人見越十年母病復劇又割右乳進之又愈御史周如斗疏聞被旌

錢之選字舜臣常熟人父坐事繫獄選與父更代繫尋隨父戍遼東籍鐵嶺衛為諸生中嘉靖庚戌進士累官兵部郎中故事官兵部乃得脫軍籍於其上書訟父寃得昭雪封父如其官遂告終養奉父歸里

歸有貞字養素崑山人父年六十一而生口授以
經輒成誦年十八為人師二十父歿居喪哀毀四
舉德行處師席者五十餘年素不禮於長兄長兄
死次兄復盡得其腴產有貞知而不言率其庶弟
居於宅之西偏族人皆嘆美有光尤亟稱之既而
兄姪輩產蕩盡有貞每賑卹之歿為棺殮年九十
餘無病而終

秦霑字光甫崑山人父為仇陷成大獄霑年十七

囚服投牒御史杖而逐之哭詣太守太守憐之為
緩其獄後得從末減領嘉靖壬子鄉薦選德化知
縣再補寧陵遇疑獄必重持之曰向者父獄起吾
仰視堂上人猶虎狼也安知今堂下人不虎狼吾
耶

張尚友字益之吳縣人精春秋之學吳中治春秋
者皆宗之事父純孝父病革刲左臂肉和糜以進
人有欲上其事者怒曰是欲我以死父取名乎狀

苟上我必死之

關

表其墓

吳士志字伯高常熟人年八歲父母出避倭中道相失士志歸守其廬曰家人終當於此索我父歿痛欲從死其大母及其母強之食乃日進粥一盂淚漬枕席重裯俱爛二母不知其夜哭也踰小祥目失明耳失聰口失音血枯骨立見者悲之冬日曝檐下手其父事狀攬筆欲有所更定舌卷口噤索飲不能嚥而卒又有徐明俊者亦以孝死鄉人

並稱孝子云

沈柱臣字公爾吳縣人受業於王敬臣參究理學事繼母極孝歲饑貿粟奉母而已與婦食糠粃不令母知授徒入糶悉歸母弟嗜酒善費所需稍緩即橫加意氣亦笑承之惟恐傷母心為縣學生六舉行優以貢授滁州訓導

張冲字應和長洲人母疾焚香籲天割左臂一爨置湯藥以進因以愈嘗服賈燕京途聞父病乃倍

道行遇盜傷肱盡劫其所賈金然故人所附全未
失也故人子來視創甚不敢問金沖曰盜去吾金
君家金固在也遂悉還千金人以為難又仗氣負
奇有俠客豪士風皇甫汭李攀龍黃姬水徐中行
王世貞俱為其誌傳

張世偉字異度吳江人中萬曆壬子鄉試服習其
祖基之家訓七歲喪母上食號慟塾中兒皆為流
涕父歿事其兄如其父急朋友之難甚於己鄉邦

有大利病縉紳囁嚅相顧必自世偉發之人有不善相戒曰無使張孝廉知死無以為殮倪推官長圩賻之乃發喪

屠嘉賓吳江人少孤祖鞠之及祖病危嘉賓割股和藥以進病遂瘳母以哭夫喪明嘉賓餽其醫久之豁然人謂孝感萬厯中按臣徐旌獎

顧順升字與登吳縣人為太學生有文譽父死甫一月母又死家又失火順升負母屍出旋復昇父

樞遍體焦爛絕而復甦強起營葬事服闋仍處丙舍萬厯中仕為兵馬司副屢剖冤獄累擢楚府長史不赴抵里即廬墓以終其年

陳星樞字拱薇常熟人廣州知府國華子萬厯丁酉舉人知湯陰縣思親告歸終養動息不離左右以純孝聞子煌圖崇禎壬子副榜授翰林典籍以親老辭徵不赴人亦稱孝

朱陞宣字德升吳縣人舉萬厯壬子鄉試會試寓

京師忽心動馳歸母尋卒以父老遂絕意進取少
與周順昌同學順昌被逮時陞宣衰經往送之周
旋甚至父終以哀毀卒巡按祁彪佳舉直孝廉請
贈諡勅贈翰林院待詔姚希孟私諡曰孝介

楊大滌字子澄吳縣人南兵部尚書成子少從王
敬臣游性廉靜見非義色粲然不可犯事親誠孝
兄弟四人析產獨取其薄丁巳戊午間歲饑民死
無算收瘞枯骼凡兩年可萬計年逾艾危坐一室

誦讀不輟吳人稱端孝先生

沙舜臣字子升吳縣諸生事母惟謹與弟舜年舜
民稱一門三孝當魏璫矯旨逮周順昌時士民全
集舜臣偕諸生王節劉羽儀王景臯殷獻世楊廷
樞文震亨等直前謂巡撫毛一鷺曰人情如此明
公獨不為青史計乎曷據實上聞一鷺斥勿譁官
旗遽呵叱激衆怒致有羣擊之事後獄具舜臣與
王節諸人等並黜

繆天秩字原常吳縣人父疾陰封股以進父竟不起居喪哀毀以創鉅遂成瘵疾年僅二十四歲卒後以子國維貴贈參政

席允信字順懷常熟人萬厯間築福山城十之一雲和塘十之二解磚解銅輓運漕糧每代鄉民償補缺額明季荒旱載粟數千斛分貯城中半價糶以為賑在其鄉施粥成梁建牘諸便民事無不為舉鄉飲賓

朱祖文字完夫吳縣人幼孤母劉勵節撫之弱冠
補諸生痛母節未揚終日戚戚周順昌初未識祖
文聞而憐之白當道得題旌部牒下祖文始知乃
感泣無何順昌忤璫被逮祖文舍家相隨往來津
渡出入禁門時遭邏卒幾蹈不測順昌誣賅數千
祖文思貸金完之以緩其死都門不足走定興定
興不足走吳橋冒暑單騎間關千餘里捃摭稍就
而順昌已斃獄中祖文以未得收屍有違初心若

不可自比於人遂鬱鬱以死彌留之際猶以順昌
後人為念

李文詠崑山諸生性孝父好飲會天寒盡醉而寢
火發文詠驚覺倉皇入父寢僕李安奔出額已爛
牽文詠告不可入文詠直入不顧以身護父同死
火中明旦視之文詠僅存一股其父以覆故猶具
體事聞表其閭曰孝子坊

張雲龍崑山人能文章有至性母病割臂和藥以

進居母喪哀慟感里閭邑遇災祲能任其役調度
周悉惠澤均平有司旌其門曰孝義同里朱應芳
割股療父疾又有尤大中以父母病先後割胸股
者再有司並旌其門

黃守道長洲車塘農人也母病目不治守道舐之
匝月而明母又疽發於背毒潰守道跪而吮之四
呵聲暗與補瀉法合疽遂平由是名傳遠邇萬厯
間被旌

周室琳字韞美崑山人祖御史元暉為里仇所訐
逮詔獄室琳連疏伏願青衫草履日拜長安門而
哭行道傷心由是臺省交章論救事得白嘗拾遺
金五百雪中停車返諸其人

周廷祚字長生吳江人崇禎初入都請其父宗建
卹典時郭鞏以宗建之禍實自己發極力彌縫託
所知囑廷祚無言當以一第萬金相報廷祚曰父
仇即死不避富貴可餌我耶遂疏劾鞏得擬辟時

法司以許顯純田爾耕崔應元先世軍功止擬絞
廷祚赴法司堂大叫曰此輩慘斃諸忠尚不擬辟
豈爾輩猶貪重賄耶法司悚然皆正典刑一時稱
快

袁扉字雪封長洲人幼孤居祖喪廬墓三年母歿
亦如之哭泣兩目幾眚或勸之扉曰與其不及情
毋寧過情予惡夫託先王之禮以文涼薄也遺產
悉讓諸弟已與婦晨夕不給至摘馬蘭杞菊為食

婦亦無怨言婦死不再娶族有五喪未舉者為營
葬焉

朱壽陽吳縣人祖文子少補諸生曾祖以禦倭功
應世襲蘇州衛指揮壽陽讓弟壽增曾祖專祠在
京口逆奄變易天下祠院乃毀之壽陽泣訴於縣
祠復存郡縣重其義贈官產五十畝不受贈金亦
弗受崇禎壬午有司應詔將以五經博士薦壽陽
不就卒於家

劉曙字公旦長洲人崇禎癸未進士授南昌知縣未任而金陵失守尋死之先是曙以父病割左股痕三寸許至是其僕覓尸視股痕為驗云

諸永明字合甫崑山人講性命之學一以劉宗周黃道周為法游成均時會道周下獄永明身入獄中周旋左右同卧起幾閱月道周貫械對簿皆明扶掖獄解出園扉名重一時

盧士達字德孚長洲人先代於嘉靖倭亂時捐貲

助軍需旌為義門士達有至性父病癰割股肉療
之母失明偕其妻晨夕互舐遂復故居喪慟哭聲
徹戶外閭巷咸知為盧孝子哭聲好施與家日以
落卒如故有橫逆不校子應琦諸生傭書養親孝
行如其父有司上其行題表為父子孝行之門

吳正一字素風常熟人明季旱蝗催科愈急正一
子身冒死叩閭陳四載奇荒得旨許豆麥搭兌蘇
松常鎮湖五府帶兌餘米捐十之四

申傳芳字維習吳縣人時行孫內行純潔少遊吳
庠承祖蔭補尚寶司丞遭父喪躃踊長號竟以毀
卒御史以孝聞奉旨旌門

金秋字有秋吳縣人年十四父歿哀毀過禮事母
孝養備至友愛兩弟析產取瘠遜肥建宗祠賙里
黨行善如不及陳繼儒文震孟為立傳 雍正十

一年 旌表

國朝周茂蘭字子佩長洲人順昌子順昌被逮茂蘭日

夜徒行至京口始及順昌麾之返曰汝往俱死茂
蘭泣別絕而復蘇崇禎初誅逆奄茂蘭刺血上疏
請誅倪文煥以報父仇當事者難之茂蘭復刺舌
血再書以進又揭逆黨呂純如頌璫原疏文煥純
如俱服辜故事贈官不及祖父懷宗嘉蘭孝義特
錫三代誥命蓋異數也茂蘭遽於易湯斌撫吳式
廬就見請應賓筵為國人矜式固辭年八十二歲
而終

劉龍光字夢蕭吳縣人與父母因亂相失道梗不
得問光日夜啼泣成疾少間徒行至盱江禱於張
令公祠宿廡下夢神有寄居石滌之語驚而寤不
知石滌何所也旁皇路隅忽遇一尼謂曰石滌在
閩廣之交今方阻兵由徑路往七日可達亟如其
言所過皆險絕無人跡最後至白石嶺斗絕萬仞
捫嶺而下其地果名石滌竟得母管於村中相持
大慟問父所在已歿歲餘矣匍匐扶母及櫬而歸

龍光好古學精爾雅蟲魚之義音切箋釋皆極其
旨

瞿昌文字壽名常熟人式耜孫年十七念其祖遠
阻廣西欲往省恐父母不聽襆被潛行冒矢石陷
重圍瀕死乃得達式耜誦退之知汝遠來之句且
喜且悲後竟裹骨而返其叔元鎔繼往不得達歿
於永安

顧廷錡字佩堅長洲人父繩詒知蜀之仁壽縣張

獻忠破成都不屈死廷錡子身入蜀陵谷變易無
有知瘞骸處者呼號路側閱四寒暑輾轉尋訪始
得之扶櫬萬里外陟險履危中間瀕死者數次抵
里門鬚髮盡白

黃向堅字端木長洲人父孔昭崇禎癸酉舉人為
大姚知縣兵阻不得歸向堅憂泣徒步往尋繭足
黧面徧歷滇中至白鹽井得遇二親迎還故里人
稱完孝

顏中和吳縣人義士佩韋從孫也順治初父宏仁
為怨家周昌所殺連控於官不得直中和年甫十
三痛其父被害日取析薪斧礪之束草為人形書
昌姓名其上以試斧逾三年中和懷斧告母曰兒
將徃復父仇母大駭止之中和竟徃值昌市中陰
尾之行昌不知也行稍前遽自後揮斧中昌首昌
方左右顧又斧之會母趣其兄孟和走視比至昌
已死兄弟乃號於衆曰願偕我詣官至縣庭兄弟

爭自承衆從旁分別言之始下中和於獄其明年
御史錄囚釋之

顧鼇吳縣人父為仇家金瑞甫刺脅死鼇時僅二
歲稍長詢母得父死狀即淬一刀挾以出入金亦
避之至年十八遇金於胥口金見鼇拔刀來刺驚
躍入水鼇亦投水連刺傷額不死金挾貨誣以盜
有司訊得實金伏辜

韓飭字誦先長洲人砥行慕義強學不厭嘗以家

財推與其兄自甘清苦卒時有詩云一莖苦菜生
平志數卷殘書汗漫遊以子莢貴受封熊賜履志
其墓稱為篤行君子云莢見文苑傳

馮勗字方寅長洲人父館閩中勗與祖及母居歲
荒乏食勗為村塾師得升斗奉養與妻采苢以食
後父客死阻兵亂弗獲歸櫬勗徒步入京為諸侯
客時徵博學弘詞膺薦得第授檢討即請假歸入
閩尋父櫬未得伏地慟哭有老人哀之指視其處

遂扶以歸

蔣德竣字公遜長洲人順治辛丑進士性至孝父病封股療之康熙乙卯歲大饑德竣傾家賑濟全活者數千人月給育嬰堂緡錢為乳哺費施絮施棺埋胔掩骼每歲無算臨卒以腴田百三十畝為義莊以贍族以百二十畝助於育嬰堂里人感其義請之有司建祠春秋祀享兄維城字公表為人醇樸孝友與德竣撫育孤姪不遺餘力兄子感之

字叔助以志弗忘厥德德竣置義田諸善事維城
與有力焉

席啟圖字文輿吳縣人父本貞好施予啟圖能繼
父志廣父所置義冢義田賑凍餒收棄骸助嫁娶
施醫藥學宮歲久傾圮為修葺復舊觀編格言為
蓄德錄二十卷

張文魁長洲人家貧性孝傭工以養遇有肉食則
携歸奉親甲申之變奉母避杭遇兵相失追尋二

年見母於嚴州王姓家迎歸終養文魁年八十一
歲卒陳鵬年守蘇題額曰至性全真

黃農字古處長洲人省曾六世孫居母喪盡哀恐
傷父心每夜卧蒙被泣日以尪弱父授經里中離
家數里每晨徃省風雨無間父憐其疾止之農乃
伺門外館僮出問起居乃去日者謂父年五十二
適先一年病甚農患其驗也元旦遍禱神廟願減
算以益父年忽一夕驚喜曰神許我矣父果愈後

農病篤恐貽父累以膳田易金置枕畔謂妻曰汝
善事吾父吾得侍吾母矣父歸含淚執手歿得枕
畔金始克殯妻金以苦節聞

顧天朗字開一長洲人為官學教習考授知縣以
母老不就選積學好義母病侍湯藥成疾及歿一
慟而絕時謂孝死有司上聞立祠

聖祖南巡賜

御書孝靖二字顏之長子沂康熙癸丑進士巡撫河南多

善政三子溥為如臯教諭二十餘年士多思之

許德璠字荆生常熟人父國賢力行善明末江陰無錫避兵來常邑者國賢計口與之居食時僉大戶解白糧往往破產國賢為公正請於當事得題准官運德璠繼其志康熙初叩闕請減蘇松賦額每遭旱潦傾困賑濟貧不舉子者出貲收養邑有育嬰堂自德璠始

金拱辰字修來吳縣人以諸生貢入太學奉母盡

色養居喪哀毀三年舍外寢杖桐見客泣涕漣漉
析產皆取其下者又厚撫兄之子若孫推之五服
親懿婚喪靡不周卹疾革檢篋中債券盡焚之

王松齡字御凡常熟人父病卧牀居鄰火起甚迫
松齡叫天搏顙須臾風返火滅親終廬墓哀毀盡
禮督學張泰交題旌

殷鉉常熟人父為仇陷瘐死鉉訴寃於上官數仇
人皆就獄且合謀殺鉉以滅口於是鉉亦被囚一

日雷起獄中首犯震死咸謂孝感動天督學魏學
誠題旌

王三錫字承寵吳縣人母病籲天求代母卒事父
養志昆弟早亡撫從子三從孫二如已出雇婢及
時遣嫁不索直捐腴田百畝倡建普濟堂巡撫藩
守給匾旌獎

顧啓賢吳縣人父病醫藥弗效啓賢不令家人知
露禱於天割臂肉和藥以進父飲之遂愈姊已嫁

而夫不事生產家蕩盡啓賢迎養之終身又為嫁
其女二人有從姪幼孤貧不能自存啓賢撫育之
及長為之授室且予之貲本以逐什一曰吾使之
可以畜家口延宗祀也

王迪惠崑山人童年喪父便盡哀毀事母竭力

雍正元年 旌表

王浦珍崑山人孺慕性生鄉里咸欽其孝 雍正

元年祀鄉賢

歸聖脈長洲人三歲遭父喪號泣如成人七歲就
外傳常泣師問故荅以不見父為痛事母曲盡孝
敬積脩脯葬祖父母及父慈烏繞墓著有莪菴集
皆白雲思親之意 雍正三年 旌表

沈自顯吳江人九歲遭寇作隨親避難中途遇寇
砍仆地自顯抱父首泣求寇感動捨去父歿廬墓
三年 雍正三年 旌表

汪宗灝崑山人父病癱跪吮不倦事母盡孝生事

葬祭悉備禮法

雍正三年

旌表

邱存禮長洲人四歲喪父七歲讀論語至事父母
能竭其力問師得解歸即以不得事父向母大慟
母愛鮮茵存禮日行數里外買歸及母歿刻木肖
像朝夕奉祀舉喪柩舟由胥江值風作將覆存禮
躍入波中扶救風頓息 雍正四年 旌表

金懋顥吳縣人五歲母歿每念及輒淚下然恐傷
父心拂繼母意惟飲泣吞聲明末避土寇山間晝

伏夜行遇險峻必負繼母不辭勞父喪聞訃徒步
奔歸聞者咸嘆息性慷慨好施親黨待以舉火者
不下數百家

顧存儒崑山人七歲喪父擗踴如成人每祭見母
哭則亦長號母憐而止之答曰母弗哭乃已既長
貧不能葬父適鄰居失火存儒負母出隨偕一傭
作舁父棺力不能勝則以身蔽棺向火而哭俄而
火滅一日見村婦抱幼子而泣甚哀叩之以夫繫

獄將棄子傭身以贖夫罪存儒為傾囊濟之母子
得全 雍正四年 旌表

沈萬育字和卿常熟人天性至孝鼎革時負母避
兵遇盜捨身衛母盜憐而俱全之母病篤夢神示
某醫可愈傾囊延治果愈建橋梁施棺槨以成母
志年九十四臨終惟呼父母雍正四年 旌孫

淑官編修通三禮著周禮翼疏年甫三十三而卒
朱之勳長洲人童年事親即知愉色婉容有訓則

跪而聽年十一父客秦勤忽寒顛因疑父在外衣
單亟製衣寄之後知父果於是日失冬衣家被盜
執母以身衛之母得不傷 雍正五年 旌表
朱鳳崑山人以孝友聞睦婣周卹發於至性 雍

正六年

旌表

戴兆箕字傳生常熟人與顧鈇顧鎧吳格相友善
三人皆貧困兆箕亦止薄田數十畝鈇無子依壻
以老格與鎧先歿鎧一子不能娶格惟一女流落

為豪家婢兆箕贖歸配鎧子且分以田屋鈇聞其事扶病往謝兆箕視其病將不起謂曰子無憂身後也吾妻死製兩棺者為子地耳未幾鈇歿殮而葬之里黨咸高其義

楊兆隆字凝厚吳縣人秉性剛正然諾不苟服賈京師往來齊魯燕趙間遇人有患難窘急者必加周卹施惠既久道路之人皆呼為楊佛子父歿舉遺產盡讓之弟弟病疽經年醫者曰必服葑劬許

乃可起時後價騰貴兆隆在京聞之即買一舫寄歸果服之而起自奉儉薄而宗族親黨間皆歲有常給待以舉火者數十家年老家居晨起必肅衣冠誦金剛經以資父母冥福嚴寒酷暑無間

錢聯珍字公玉吳縣人本姓顧幼繼於從母故從錢姓家服賈既稍能自立即迎本生父與繼父母同居兩家尊老優游聚首垂三十年既而相繼歿附身附棺盡哀盡制各竭其力營葬地使兩塚相

望而廬於其間朝夕哀號聞者悽感有子五人治命使長子三子承錢姓而其餘復顧姓以各守宗祀焉 雍正七年 旌表

曹天祿吳江人母雙目瞽日以舌舐之目復明父歿痛絕復蘇廬墓盡禮 雍正八年 旌表

蔡來信吳縣人世居洞庭山幼孤事母孝定省溫清甘旨滄髓必曲體親心母年七十餘卒哀毀如不欲生喪葬盡禮祭祀必泣上有三兄長與叔俱

早世撫其孤至於成立事次兄極恭順事事欲得其兄之歡心 雍正八年 旌表

徐杲吳江人年十六被盜劫父去泣請身代不獲負父屍歸哭控當事捕得盜伏誅 雍正八年

旌表

張惟馨吳江人年十二父被盜劫冒刃蔽其父盜憐而捨之一日父墜於河惟馨躍入急湍抱之俱出父病侍湯藥終年不解帶及歿哭廬墓側哀動

行路 雍正八年 旌表

李漢長洲人十歲父亡母自經力弱不能解跪捧
母足哭聲震戶外鄰人排闥解之一日奉母過太
湖風作舟覆漢抱母浮沉中流忽一漁船出救母
子俱得無恙以母苦節未旌終身抱憾將終猶執
子手連呼請旌云

程允元字最先常熟人六歲見母病目呼號不食
跪母膝上舐之稱為孝童及長鄰火延及父寢父

方疾篤冒死從烈焰中負父出焦爛而卒

葛光熹常熟人襁褓中即喪父母鄰媪抱而育於葛長而傭工得一壺一嚮必以奉葛氏父母妻失親歡遂棄之葛父歿光熹將賣身買棺鄰里義而助其終事又積傭賃之直葬其先世數棺焉

張友誠常熟人早失父母為人刺舟遍求父母棺骸遇一老尼其族姑也為言兩棺朽壞久為墳丁棄骨河干矣友誠哭赴其處躍身入水鄉人援救

之得不死乃刻木為兩親像朝夕祭告如生存

馬維仁常熟人父患背疽危甚醫曰欲知可治與否必嘗惡以驗維仁嘗之味苦醫曰可療但毒已內蝕必吮之而後出維仁吮出膿數升遂痊明年維仁病瘵臨死戒其妻勿哭恐傷親心也

張爾翔字集之常熟人歲遇荒歉輒行糜施樁嘗遇人鬻妻者周之以金俾得完聚倡建支川長橋以便行人

蔣文瀾字葭友吳縣人康熙丁巳舉人歷兵部職
方司主事候補按察副使雍正五年偕弟姪文源
文涵文滂腹松應鼇等捐貲三萬兩助修水利被
詔褒嘉卽家加光祿寺少卿

孫鼎鍾字采章長洲人天性純孝年十五母患脾
疾鼎鍾衣不解帶者八閱月危急中禱於天請減
己算以益親壽又剗左臂肉和藥進明年母果愈
又三年母歿奉父孝養備至父年八十餘疾作氣

血俱枯鼎鍾鬻其衣飾房產易復以供又數月卒
鼎鍾廬於墓三年 雍正十年 旌表

顧潘字方水吳縣諸生幼孤家貧力自節縮以供
母甘旨居母喪哀毀幾不欲生三年未嘗見齒亦
不離几筵撫其弟幼則勸之學長則授之室老而
貧也割產以資其養凡親族之嫁娶婚喪有不克
集事者隨其疎戚而欣助之卒後張雲章為之傳
李鉞字含奇吳江人康熙辛丑進士入翰林少孤

事叔父甚謹周旋羣從篤友誼吳孝廉苑客死都
門鉞酷貧勉力殯之鳩十金謀歸其喪會患瘵而
卒病中復苓之費皆自借貸而所鳩十金猶封識
牀頭從弟成其志長於詩有鄧尉山房集

盛建極長洲人十二而孤居喪哀毀骨立每時祭
必流涕母病痢親為嘗藥滌穢曲體母志篤愛二
弟周卹姊家至老不衰 雍正十一年 旌表

劉振時昭文人家貧父母無帷帳振時方數歲為

持扇驅蚊終夜不倦父歿哀毀盡禮後以貨殖家
隆遂好施予欲為母祈延年母歿合父喪葬於城
東北麓廬墓三年鄉里皆感泣焉 雍正十一年

旌表

徐國措長洲人 呂棟常熟人 張士仁新陽人

雍正十二年俱以孝行 旌表

孫豐穀長洲人父仲謙卒慟絕復甦哀思不已冬
月母病思食梅實泣林下三晝夜得之人以為孝

感云

蘇宗芑常熟諸生課徒養親母張氏疽潰不治籲
天求代夢一老人指徃興福寺求醫次日果遇老
僧昇藥二丸而愈及再徃問寺中並無此僧也

趙嗣孝常熟人繼伯父世鐸後鐸歿母陳氏欲殉
嗣孝哀懇母乃緩死後出帶示之曰我欲以此終
為汝孝故得以天年終矣母歿負土築墳廬墓五
年

李象塚昭文人家貧父病塚甫八齡日嚮菜果得
錢以供甘旨冬無完衣族兄象翼勸其就學塚以
謀養辭值鄰家火塚負病父出母亦尋出塚不知
也復入烈焰中哀號求母者再被火傷卒
以上雍正十三年 旌表

江南通志卷一百五十七